

摘藻堂四庫全書薈要

集部

欽定四庫全書薈要

集部

遵巖集卷十五



詳校官候補通政司經歷臣郭祚熾

欽定四庫全書薈要卷一萬七千七十二

集部

遵巖集卷十五

明 王慎中 撰

誌銘

素隱處士詹翁暨李孺人合葬誌銘

  
公諱祿字廷善自號素隱居士泉州安溪人開州同知

公靖之第六子開州公以正統辛酉舉人尹廣昌九年  
擢開州廉惠得民以良吏祀于州學祖乾清曾祖貴庸  
高祖進祺三世不顯其上世有以文學材行舉為同安

安溪教諭而初祖清隱公敦仁尤有勞於邑歿而見靈  
有宋咸淳封靖惠侯建廟尊祀勅其額曰靈惠周顯德  
中閩自為王清隱辟於閩王始議置小溪場為縣今安  
溪也安溪為縣而清隱首為令方五代擾攘之際草創  
建立經制粗備而拊循全安之邑既大治即謝去隱于崇  
信里之佛耳山其歿久而神非偶然也詹氏望於安溪  
非一日矣翁名家子有奇氣弱不好狎如老成開州公  
卒于官蕭然貧也母林太孺人扶喪治墓生事百艱翁

感母之劬棄舉子業專治家雖少能不愛其力而有揆物待人之信智清隱家佛耳山之多鄉村去邑治遠開

州公旅櫬還郡因墓晉江之羅裳山翁啟林孺人曰便省墓而教諸子孫肄學莫如城居請勿以徙難母兄勉從之其後兄之子源以甲科為御史副使澄以貢為教諭弟之孫彬為鄉進士翁之次子洧以貢為高要邑丞詹氏復蔚然望於城中翁之貽也翁以幼子任家奉母以佚遺其二兄使就學為弟子負既而兄早世弟嬰痼

疾又為周旋其家政禦侮恢侵持緩赴急情款殫竭力亦副之諸子姓憚而加慕事翁猶父副使公貴倨然獨為翁屈謏謏然恭也治生常以暇為整不役數設機意豁如也衣食取足自充無饕牟之慮國中邑宅郊外墓廬相次偕作靡靚牖衲階礧潔緻不豐巧而風致可悅翁在國郊相半以示達於死生之故而市塵不勝野韻也在國宅與二三耆叟為逸會詠風嘲月俛朝仰夕郊廬所伍山農海漁談桑麻鹽魚力作之勤相為勞苦穰

賽灾禁觴酒豆肉巫舞覲祝均其憂樂年齡既邁而輩  
望彌尊鄉人無少長賢愚皆知有素隱翁始娶吳早夭  
再娶宜招李宜招屬漳州龍溪而與多鄉隣也李姓望  
於宜招故李孺人歸翁孺人性孝慎而刑於夫善執婦  
道事姑友妯娌上順下諧庭內無間言靜而不媚置側  
室秦馬二氏以廣夫之御能以禮自約使代御於夫多  
子而育之甚均有鳴鳩之一故翁得頤適神志老而益  
康孺人亦厚而無傷年八十九而後終也翁七子洵泮

孺人出也溱淮瀚出秦氏潮淳出馬氏溱淮泮早卒不  
嗣孫男十一人曾孫三人洧慕古好學為高要有儒者  
之守忤勢見黜翁卒嘉靖丙申十一月年七十有六洧  
與諸弟葬翁於自卜之兆罷高要歸侍李孺人數年母  
耄子艾慈孝怡然也甲寅七月十二日孺人卒而以其  
歲十二月二十四日奉柩以祔于翁翁之葬也洧方為  
太學生念翁德誼之高非其人莫以銘且將有待也茲  
祔孺人以銘屬其以高要君之學之古圖永其親之傳



慎其託之重而虛其日月之久也而以屬予其何辭翁  
貌魁美髯目光燦爍音吐巨暢情致有以感人弘治辛  
亥劇賊溫文進之亂安溪尤擾翁扶母逃匿僅脫母而  
自為賊得慟號哀譬賊不能害監司主督捕賊者廉知  
公名召至庭中問計翁為指畫山谷形便兵道所從入  
地當據及所宜避與防之險塞竟如翁策賊以平其才  
有過人者豈猶靈惠公之餘烈耶銘曰

鳥顧而四瞿手口拮据而瘡或以家腴亦或以落枯

反以不憖餘徒天之及維恬維愉母牯其軀生亦以  
于于神明守其都絕鬼之盱敷遺斯需後之人勿卜  
其孚

處士楊角山墓誌銘

是歲甲寅十二月二十四日戶部主事李君存孝將葬  
其父角山處士于高魁山之原謂予哭曰傷哉纘之無  
以寧吾親於土中也勤苦一經以起其家未及以一官  
為親榮使其旅卒而不得視其含歛魂營營而不知所

如往盡然徒生即欲自墮又慮非所以死也疑於處生  
死之間永抱憂悲閱祥禫而彌痛勉襄大事續其可以  
死乎先生其謂若何先生若使吾親有以掩諸幽者續  
猶未忍即死也惟仁人其哀之以貸吾死嗟乎李君孝  
思之篤而詞之窮也予何以辭李君以三禮試春官魁  
天下士晉江文學舊矣魁天下由李君始天下知李君  
之文必知其親之教角山隱約問巷一朝趯然遠出  
覽觀京都制度沿涉長淮大江之壯適游吳越觀其佳

麗足以自廣即不容外有大故固當不免即不免何必  
守一室屋隅之下也士一日出所學通籍於君不得不  
與親遠不幸有大故宜其不得在側而君深引以為悲  
嗚呼篤哉由斯以言君之痛其可以平乎君方以文學  
事業進顯於世為其親光寵將遠且大豈以得一銘追  
死而其詞如此可謂孝矣君復哭曰以不敏之文售有  
司固吾父之教又有厚遺焉吾父任質好義中心獨出  
於順祥充其心之所思莫非可急之人而處於卑約不

能踰分域之外過有所用其力也顧力亦副其心矣故  
所儲不溢鍾釜而每能推於匱乏所履不越闌闔而常  
有救於緩急不敢以色詞加人而譬諷所及聽者嚴於  
呵責不肯以機數致人而坦露所懷親者固於拘維鬪  
攘方拏械穿潛張而驟解默弭於微辨笑道之下者不  
知幾人修於冥冥不可見之間以畀不肖今日蓋吾父  
積勤累善之遺也謂其積之而將享之遽以五十有八  
之年卒也此績所為甚悲而姑以盡心於土中道死責

也。纘又有請於先生。吾楊姓也。高祖副曾。祖宗彞。祖貞。世居安仁鄉之鈔舍村。以力農本業。自給。吾父早孤。而婿於陳城。居也。遂居於城之東隅。陳母故李毅齋公某之甥也。毅齋無子。故吾父育於李。而為之子。禰李而妣陳鄉人之敬愛。吾父者。知為李角山翁。而不知為楊也。惟吾父始配陳母。知之。而繼室張氏。謝氏。與吾兄纘。亦不能知。而纘獨知之。今將題名於阡。作主於廟。惑於所稱之姓。先生其謂之何。予嘗及接翁。然其遊京師也。送

之郊觀翁先後無異容其微也不誣其子顯且貴也不  
矜殆有常吉人也李君自言其父之德皆不為誣善信  
可銘也若夫宗之必有別異姓之不相為後也在禮記  
之矣李君雖欲徇翁之情其如禮何請志之曰揚角山  
處士之墓而銘之銘曰

觀翁不取鈔村之田捐以與其弟兄所以專其情於育  
者之義也事李氏父母生死盡力亦足以明其不二於  
心而報育者之德矣茲別其宗以反于揚維禮有攷匪

倍輕忘翁其安乎即此山岡斯謂有子能善其親之藏  
安人王室端惠林氏墓誌銘

林安人之葬也其夫王道原君相域于邑之下逢山治  
壙視役見星出入與其子均勞曰吾不得視其殮殯以  
王事也公之廢私久矣然何以釋吾情茲而不勞將何  
以用吾情卜日得是歲甲寅十二月二十四日庚寅之  
吉行事道原子弟也拜且泣曰其哀惟中而銘吾妻始  
先大夫封吏部考功員外方渠公為叔子納婦蓋安人



也予適以主嶺南辛卯試事過家安人入門方渠公大  
悅謂某曰吾賢叔子決其必貴此女儀德固當貴可與  
之齊矣道原學於予自少而言動有則在私宴無邪安  
人能不以惰媠見謫於夫莊慎有容家人竊伺莫得其  
幾微吾母太宜人總一門之政好自勞而以佚遺諸婦  
安人常先其姑承事趨動不敢以尊者之遺自荒吾室  
陳恭人溫靚而蕙在娣姒間每居弱處後安人遇之獨  
執退謹知其夫之事兄嚴而然也安人資慧敏綜時物

揣求人情頗有役智而性剛卞以其夫恬毅遠俗不問生事乃益摧縮不敢見其能一切近利殖產之計斂置不用惟以儉菲自約而已內外事惟其夫之制莫適為可否復善含鎮忍事家人巨細得失鮮以聲色徵發人終不見其卞急也歿於淮上一女與二子同度同麻在側流涕長呼曰妾終不得侍姑太宜人一日之養耶身死不足恨而廢吾夫代養之命其何如呼天者屢之疾甚已贖出誥軸付同度謹藏之曰與而父別於京師手

以授我者庶而父知我意之不懈也檢橐中百五十金  
示女子與同度曰此而父斥賣屋馬合餘俸而具此將  
以為爾婚娶之貲勿以我後事費歛用舊衣可也是時  
同麻方六歲抱之手中瞑而後舍之同度歸言一家尊  
卑聞之無不悲痛太宜人至為一慟幾絕也同度知盡  
費其金治歛殯奉櫬而返畢喪當遣女同度發故笥呈  
太宜人狄冠之外蕭然簪珥數物衣皆敝暗予與季弟  
性中為之營辦而後女得歸於是家人知安人之在官

能貧而不愠也道原顧垂泣謂予今之畜妻子者非必  
仕於朝有祿賜於君宜亦能使之溫飽且佚吾再命於  
宦籍而室人終身食粗衣惡顛頓辛苦於邸舍道路以  
至死也吾其為不仁人耶吾思母之養不能釋位而退  
又不能御以如宦所徒輟吾妻以歸使其客死吾其為  
不德人耶即令病時猶在邸醫藥有輔或不死是吾  
貽安人以死也吾何以自逭於幽明之間嗟乎君之篤  
於痛而疚於思則誠厚矣若夫以廉貧不能豐其內為

不仁以輟妻子之奉侍其母為不德則非學於予者之所聞矣乃收涕而泣葬安人以其夫兵部武選主事之恩得命其后由儀部郎中轉尚寶司卿今以使命過家同度娶同邑四川右方伯黃葵峯公光昇之女女子嫁南安庠生潘志遠同度志遠各有女子一人安人皆不及見同麻聘建安故相楊文敏公之孫鄉進士華山君肇之女安人在官邸預議不徇女婦之見以遠聘為難亦其識之所至云方同度以喪歸太宜人將返櫬于家

而哭焉予為敢厝于先大夫東山瑩兆永慕之精廬道  
原在京師聞之號哭拊擗以不託觀於正寢為恨予貽  
書為言古者喪車不入國凶事有進而無退往而不返  
之節且朝夕奠以几筵致生而奉之者在祔魂之帛棲  
神之主而非藏魄宜速掩之木之謂也道原乃愾然含  
恨而自慰茲就東山之廬啓敢而設柳禮也銘曰

以琴瑟和御之燕好為後而以甘旨左右之娛侍為急  
此女婦之所難以名位修勅為可榮而不以貲畜腴潤

為足賴則士者有不能而安人之知及之嗚呼其生而  
然其有所刑於家而然是皆可賢銘以昭之內懿有考  
其勿諼其視茲阡

陳啓文墓誌銘

安平於晉江為望里里之望姓可指屈者不數家東積  
慶坊之陳其一姓也陳氏有曰啓文字質儀翁者以善  
聞里中其季子武勺婿於王氏吾姑也故其葬某為之  
銘翁卒於正德癸酉歲長子及孫相繼亡叔子武靖與

武勺始力圖之故其葬緩翁生正統己巳時方朴畧未  
習於聲華閭巷壯者暇日力修本業以養生送死為福  
不以治舉子學求進取為貴也翁少略涉書知大義而  
已故絕意於聲華之途而鄉里所謂善人者力不得以  
有為其為善僅充其心之所思而不能踰其分域之所  
不至也翁之父元泓頗蓄田以遺三子未有命戒以析  
而沒也二弟欲析之翁不能禁則使自選其善田而後  
已取之多荒瘠也盡一歲荒者墾瘠者肥量田所入以



為出久之有餘以其餘貲附宗人之敏者貿遷于外日  
滋月長翁不疑附者附者亦為翁盡里人共貲行貨多  
以凶終翁獨終善生既日裕自隱於心曰吾身所自出  
祖也身所由分族姓子孫也敬祖莫若豐祀愛族子孫  
莫若教以學乃自置祀田塾田曰吾以上竭敬思而下  
開詩書之業其心盡於此田矣友其二弟終始無間言  
事二姊老而彌篤歲屢迎至其家進飲食以娛之每迎  
必數日浹月而後返曰無幾相見也出見鄉人恂恂謹

幅不敢以色貌侮人與賤少者均禮加誦焉翁所為善不能踰分域故如此矣娶黃氏先卒生子武瑩武寧今亦已卒黃氏之葬翁自為壙誌曰只志生卒年月葬地坐向及平生一二細行足矣無他善可以厪顯者之筆也其識又如此繼娶鄭氏生武靖武勺鄭氏後翁四十餘年卒為今甲寅十月武靖武勺始奉翁葬于安南縣蔡山之原與黃氏合而鄭氏同祔焉卜以十二月二十四日行事而來乞銘孫曾玄男子十四人多聘名家女

翁葬雖緩而得銘翁又何憾銘曰

承厥貽不墜其基復培以菑燾厥後既遺之有且示以  
守其終曰寧其藏孔固維我銘之維其子之故

封文林郎監察御史鐵山公墓誌銘

嘉靖乙卯十月九日劉君志仁葬其父封御史公于邑  
施山之陽與母葉太孺人之兆合而以志屬予曰非得  
子文孤將何以葬吾親始志仁君以松江知府俟調過  
家公促其出者數矣君濡戀不忍竟得奉公之終嗚呼

孝哉公喪於嘉靖甲寅九月其喪鄉人爭走哭哭多盡  
哀無遠不至肩踵摩接巷為之塞其存值公生辰姻黨  
隣里皆來壽焚香盥祝莫不願公百歲其得榮哀於斯  
人予頗恠何道致是公貴且長矣與人彌恭色溫詞至  
論事細析毫毛精中膏肓大黠小慧欲以情貌深厚盖  
其過非逢公皆剖露無所遁匿公既善得人隱曲又惻  
怛懇款耻人之過樂其有善如已得失所譏斥獎許嚴  
於官府予奪人用勸沮於其言以故鄉人有相構為虐

者多自解去不至於有司雖富而御財有義往往知所  
縱弛以振業乏窮嘗為衆人之母惡菲服食不邇於驕  
佚故多悅其富無怨妬者生死得人之哭祝其道由此  
可不謂偉丈夫所為哉貴富而為義勢便事易世之能  
知公者止是矣公未以子貴家中衰貲落矣隨力所及  
與人同勞逸甘苦一糲一盂遇有寒饑推共衣食微為  
匹夫能得人死力所至有附其赴人緩急風雨疾病期  
至不爽畧刻同安之俗在弘治正德間以雄長俠武相

夸尚其魁則聚徒衆置要約旅拒官府蒐瑱細族則嚚  
訐健鬪視庭中牙爪角雀勝者酒食鼓舞賀之耳公始  
好詩書士人語自悼幼孤老多難不習儒業獨發憤於  
其子志仁君才過人業既通聲聞日起公益延名師勝  
友厚與為禮非徒以廣其子之學亦欲風示里中知讀  
書可貴而弭筆探丸之不可為也處卑履約矯然有濟  
物變俗之志又其近於仁矣志仁君為御史疏諍廟議  
與小人獻諛侮禮者為異同章格不下數日或傳至家

客多以禍不測為公憂公抗聲曰主聖臣直其何憂御史果不獲罪御史出為松江遣輿卒迎公客皆從史公以吳淞美水土多珍物宜往饜饗吳中民吏善事長官往使民吏一謁太守父逡巡跪拜足明得意也公曰使吾在兒子郡邸中且閉門杜徑民吏何由見面日買魚菜數錢併禁苦婦子僮奴口腹矣且使吾為饜家顧不足充吾慾耶客謝愧輿卒空返貽書松江勉以守官愛人而已其所以教子推此可知也公名恭字大受居鐵

山之下故以為號曾祖雄正統間散家貲萬緡糾義誅劇賊賊焚其居與僮八人俱死官為祭歛鄉人哀而義之至今祖弘淵父朝權為學官弟子早世公獨與母王氏居比長娶葉贈太安人者也因奉母以僑于葉自力於焚窶艱蹈之中忍閔耐侮竭盡勞瘁以持其家待子有立計數明而識慮遠非偶然倖遘而有今日也年六十九繼室林氏男女皆出葉太孺人長子存德即松江君存業國子生女適蘇芾頌張銘郭顯有孫五人夢龍



從龍邑學生如龍為龍起龍皆幼施山之兆公葬葉孺人所自卜堪輿家以為祥也存業與夢龍以松江君之命來速銘服麓容毀非乞銘之詞不出又足以知公之教也公孤時諸父弗友弱王母之寡謀殄其孤叵測屢矣公幼即多智能如母教指潛形謹跡不踐禍機昏夜出入自防飲食心動輒不如竟免於害諸父知不可殄絕則漁奪其產耗之盡公泣謂母曰是物他日兒能自有之勿與爭其僑于葉辟家禍也諸父竟以凶終諸孤

淪落存者蕭然公洗沐拂拭之時其婚嫁為營貲產不  
尤人所難哉銘曰

丘夷淵實伏倚之質趨蹶徐行緩者乃疾謂夫懵懵奪  
予凶吉如衡移權鈞得銖失維子能賢由義教出化虛  
為羸用儉節術彼冥弗窺偵其信誣盍觀于茲刻銘幽室  
封太安人慈儉程氏墓誌銘

予弟道原好言一時名士賢大夫於鄉同榜中每譽陳  
思植君之為人言其才猷節概能當人之所難充其所

為禍患事變足倚也君罷官最早為廣東僉事好繩  
嶺南吏民以法由其母教以不可曲三尺阿比上下也  
嘉靖庚戌罷歸拜母笑曰吾所以教汝宜為好官然其  
術不可以久官也術固當爾其勿悔善侍我左右我不  
汝疵咎也君娛侍方樂而其母以甲寅六月不幸移書  
道原言不得奉母太安人以終身而大父封主事公暮  
年有悼亡之痛詞旨酸楚如不欲生道原持示予予竊  
敬思植之孝而因知其有母之賢也君卜乙卯七月某

日葬母走倅山中以竹溪林君所為狀乞銘其詞甚哀  
而有文予既因吾弟知闔有君又知君有母君復以銘  
母惟予宜也何以辭按狀安人諱粹然程氏父謨貲雄  
于鄉祖隨州知州亨有詩書之澤焉安人生巨家而澤  
固存頗聞圖史之訓戒笑語不妄靜莊有儀入門而封  
主事公某之母與大母皆在二母材性不同安人事二  
母各得其意母李氏勤於事譽其婦曰無惰事大母蘇  
氏嚴於禮譽其婦曰無愆禮故其夫以善事父母聞其

為夫育同祖之孤姑撫之猶子敬之固姑也方貧能使  
內外無菲缺而銖積寸累化約為豐不待其子之貴家  
駸駸起矣子貴祿入日有餘籌廢舉權贏詘其事纖密  
而不煩築室治田多而益辦主事公如嘉服珍怡如也  
其子謝官亦有以為歸精敏有過人顧不以巧知見稱  
親屬長幼見謂有德淑溫孳孳然恩意接遇人有加也  
富而彌儉老而能勤勞於陳氏令善終始純備矣方安  
人舉僉事君年三十三矣又無他出獨子而晚顧子不

以小慈敗義課督不少貸僉事君既賦材異人無滯課以煩師櫛猶時時以小嬉間情受母訶撻也舉男雖晚僉事君早貴以工部虞衡之考得封御安人如官邸食四方水土腴美之物狄冠展衣榮於闕下都膺腆以閑其家剗剖綜覈頤使指授尊於內外族戚之間殆十五年所享顧大愈於早有子者亦其教有以篤斯慶歟僉事君名梧女四人適李魁商周竣夫蔡宗安李俊卿孫男一人主事公名之曰紹長孫女許王桂戶部主事健

之子幼二人未許人其葬在八都蔡坡山之原安人居  
常好言古慷慨烈節事於今賢尤篤也僉事君權木江  
陵時湖廣巡按御史按顯陵內臣不法事急反為所中  
逮繫赴詔獄安人問君是中御史者誰璫何許人也君  
答閩人也安人怒嚼齒吾閩何得有斯孽慎勿與之通  
顧御史以持憲蹈禍得微自沮悔耶君厚資御史赴逮  
之費歸為安人言無悔狀安人喜加他日昔怒始復嗚  
呼是可銘銘曰

孰不有子孰不多有孰享其祿以昌于後亶斯令享自作之究傍羨側睨孰苟貴富庭特奧祥由牧與狩著此銘詩以告他母嗚呼斯石其勿以朽

封職方主事蔡梅園公墓誌銘

武選郎中龍溪蔡君奔喪過泉匍匐造予輒哭輒拜哭不起曰文也罪罰不得視父歛五內崩摧終無以自贖忍死治葬請求贖於君子至漳久之使來曰卜地里之原將以是歲乙卯十二月日襄事君方以文學操行



有見於世所以自贖者遠矣奚所託於予文按狀公名  
廕字德流別號梅園漳州南溪之蔡望於龍溪公之宗  
尤望於蔡然世未有顯以系傳遠族居繁為望爾祖父  
弘安皆含和履厚自樂廛田無聲華之慕故公少不習  
為士而稟知獨異軼宕多大言趯然有不安一室之志  
曰丈夫生欲何為而沒沒老環堵間為無能之人耶舉  
子業拘繞我固不樂學泛覽史傳頗談其成敗得失抵  
掌誼詭學書不能工曰吾不能為時書篆隸古體可學

也無師授而偏嗜獨契畫坐夕卧畫被摸腹落紙輒喜  
他人評可否工拙不介也繪畫嬉涉為娛不入品目而  
往往有韻踰嶺遊吳越登虎丘吳山高頂太湖鉅浸浙  
江驚潮駭目蕩心狂睨內什絲竹妓女滿席意不枉也  
久之還家母謝氏譙之曰而不工不農放浪遨跡終不  
謀家乎踧應曰致富之術在兒目盼手畫間第不樂  
為耳今知奉慈教矣因出子母錢若干籠百貨視時緩  
急人棄我取為權間出奇變時急不趨人取不競卒

以緩致急以棄微取倍利徒羸盡入公手諸同利者服其知而嫉能也曰蔡梅園命愈耳公聞笑曰是在計然策中非心通性靈不得也渠不達而羨我命宜其終不我若矣術既通時時有所寬捨求自遠於營財沒義之嫌精小兒醫為人治多不據方投藥燭艾火灼之十不失一有請必赴或以金謝公曰若視吾售醫者耶所以治此業而樂赴人之請者欲以多活拯為有濟於物也謝者愧拜而已三子伯宜季懷仲武選君也嘗指仲子謂

內嚴氏曰蔡氏之顯在是兒矣使伯季持家而課督仲子以學果舉進士選為翰林院庶吉士授兵部以其官封為職方主事嚴氏封太安人公雖意愜不負素所期亦不為溢喜蹈世人夸艷挾恃之過約教子弟僮奴毋敢苦里中及溷官府請寄鄉人咸尊貌之不以榮貴故嗚呼賢哉公以嘉靖甲寅五月八日卒年七十三女三人嫁周某徐某劉某皆名家孫男七人始武選君以主事奉使過里為公壽里中人爭持殽酒來賀公遍揖賀

者曰公等請言乃公所以得賀乃公為若受殺酒客各  
進所言大抵多譽公善教樂施好義急困之報公不領  
也最後有言公多活性命襁抱中嬰孺無橫夭是所以  
有今日公領之顧謂曰活人豈能多惟此心不負可與  
神明對耳客皆懽服於是盡謝諸殺酒而大置酒酌賀  
者里中人無不霑醉出門舉手嘆曰公真德福人吾輩  
不及也庚戌歲兵入邊犯內地京師憂之公貽書武選  
君為言備禦防守大計以籠貨灼兒為況曰使籌勝決

機如吾權百物廢舉帥布卒扼害險據形勢如吾審穴  
舉重而輕者赴攻本而標者從兵事不出此矣武選君  
佩其言施之謀議中微鈞要大司馬多資用之嗚呼公  
雖不顯其有濟於物又專在活數小兒之功即是宜銘  
銘曰

或逐其外而培其內以為神懟有葆其醇而抑不伸亦  
綺於人與人者偶惟公之有靜撥其幽克對不負宜篤  
爾祐以昌于後

中憲大夫雲南按察司副使楊西渠公墓誌銘  
西渠楊君名逢春字仁甫泉州同安人予舉乙酉榜同  
年友也由己丑進士授杭州府仁和縣令父喪未至官  
服除為蘇州府崑山徵入授南京道御史出為廣東按  
察司僉事母喪去職起復僉事為四川按察司擢河南  
布政司叅議積資二十四年始為按察司副使未至雲  
南卒于叅議之官舍年五十六卒之二年為嘉靖乙卯  
十二月十六日葬于邑之某山君居官竭心奉職凡職

所當事事悉力從之事有犯忤人所縮首善避及勞險不可必濟偷則苟安君必引為己責曰職所有事也直前勇赴不反顧沮悔常為巧者所目君初不知久之或知亦不變也曰使衆人智而我為愚不亦可乎且使我不愚則意貳力分於事事亦不能如其職矣是吾正有賴於愚也又烏用去之崑山稱富縣前令多以富自没有能不没於富而諸獻遺權力猶不敢裁罷君曰費人之財以買聲市恩而詭於不貪人之費斯孰執其咎一



切罷之其政覓民急吏賦籍獄牒胥史不得竄手戶受

賦重輕獄當決縱榜示出無不愜服不復求吏知權不

在左右也撫按異意條教難遵君据理疏正當以理為

君奪舊令最以故方伯慈谿楊子器公為賢至是有前

後楊之稱蓋以君繼方伯公也江南北諸郡邑以歲時

餽留臺為常君入臺餽不敢至曰是嘗為崑山盡罷諸

獻遺者不可溷也巡視江南北倉庾汰黜庸貪風采振

疎所部廣屬吏滋多人人如君臨之在廣東分巡嶺南

道疆界遐曠徃獐蕃育其中數為民患故嶺南兼有兵  
戎之寄法弛日久將玩卒情賊白日剽通道行旅梗塞  
相為蒙蔽以苟歲月而已君首舉綱維責郡縣以修政  
息民之要然後易置將領選卒訓練指授方畧自是賊  
發輒得野聚荒村開戶而睡矣在蜀領鹽書專以鹽屯  
為職最號煩劇利源所在豪右穴之君綜刷成額按籍  
考要在侵月虧瞭然可見偽巧無所飾課入日進時敘  
州戎縣都蠻畔殺略吏民長寧戎珙一路邊無居人監

司相顧莫肯發口君獨抗言且設禦取之策撫按相與  
謀非楊僉事不能辦此會檄以都蠻之役委君君至益  
用耳目知蠻敢為不靖由屢撫養其驕桀之性非盡勦  
之後益不可為度險阨分兵四路約期進勦君復計蠻  
素以撫徂我若因而誘之宜必我徂得之易也陽撫其  
四鄉而以勦二鄉為師名果得四鄉最桀者四十人以  
來盡殲之用是兵入有功停斬以千計湖廣分部潭邵  
之間戶多亡逃客戶据其田逋稅猶責主戶之存者故

亡益多而逋殆不可校君為法使稅常附田以行田與  
稅不得相失而互為有無也平賦均役通滯節冗事集  
而令不煩其在職獨久復因暇日興起禮教訓勵生徒  
士奮於學者彬彬然盛矣所至盡心於職大較如此故  
其以憂去嶺南以遷官去蜀民皆若失所怙相與泣曰  
徃蠶復苦我矣其卒於湖南民走哭相踵不絕喪歸罷  
市舉聲以過喪出境乃已君世不顯曾祖某祖某父某  
皆以謹朴守家君貴贈父為御史封母某氏為太孺人

君天性孝友與弟逢陽終身不異財守官廉約所餘俸  
悉畀逢陽為家逢陽亦不敢私君之內子封孺人洪氏  
能無吝情一門友恭雍如也於交游篤久而不忘欽欽  
在鄉間間敬老字幼不以貴倨有人所不能及也君在  
崑山邑有故相當國子弟僮奴暴里中君逮置之法移  
書都下懇惻侃切言以德為愛之意故相報謝暴者終  
君之任益戢嘗欲奉其父祀于鄉賢祠邑子論有異同  
君持之故相滋不悅然未嘗敢短君也為御史值東宮

備官僚時相引置私人物論大譁君首彈之相權寵方

盛莫敢齒及上覽君疏嘉納為易置所引用者時相氣

大沮欲中君以事而有所畏遂以僉事出君臺中在嶺

南韶州守倚故相大為奸利不法事總制撫臣憚相權

益優異之君白發其奸撫臣搖手君曰坐視民患不除

不能一日安於位除患而以禍去心所安也撫臣內惡

其言而奪於君之法韶守竟不免此皆其悉力於職人

以為愚而君嘉為之者其在蜀都蠻之叛非君職也直

以憤在職者偷事病民遂以身任之功成而賞不及反  
以得謗久而後白尤人所為愚者也然君仕雖不速化  
而正論常歸之使昌其年仕終當達視巧者遲速之間  
耳而遽止於此豈非命也夫子二人長士遷娶臨海尹  
林大樑之女次幼聘某女嫁某銘曰

淑之湯湯下流長兮魂飛于上儉昭揚兮歸旒翻翻有  
攀傷兮復魄故丘固且良兮雖吳與蜀嶺之陽兮山阻  
水逗莽異鄉兮尸祝報享酒牲芳兮胡必茲丘歸斯藏

兮詩于墓門荅精爽兮

奉政大夫刑部郎中蔣悟菴公墓誌銘

是歲乙卯十二月六日奉政大夫刑部郎中悟菴葬其子郡庠生陞奉郭白峰公之狀來乞銘鄉先生家居能急人之病不受勞勩求瘼搜隱籌所宜揀振出危苦語感動在位平鬪者曲直以情款諭人於不爭使直者得曲者亦不敢以為失若是者惟悟菴賢其沒而上下之間無有能為強聒說教者予蒿目視人之病不能揀方



追思公又烏辭銘按狀公名孔煬字君和正德丁卯舉人登甲戌進士蔣氏自浙之長興縣徙閩國初編遣從軍故籍隸于衛其姓視他籍最著高祖佛保曾祖遂祖道父文權以公貴贈奉直大夫南京戶部員外郎母何氏封太宜人公生而敏明有識量比長益習億物揆事審而不煩方貧不足能以攻治課業之暇營父母之養常若有餘始仕為通州知州州繁庶甲畿郡財賦刑獄簿牒填委民吏仰視側睨公為之如素所熟會計羸縮

節浮益虛財賦贍足宿府猾吏無得竄其偷偽兩造至  
前情輒披露情得則稍薄其罪庭中誼呼稱平久之狂  
狴為空都憲重臣監察臺史相踵奏薦以公才可大任  
每行部未嘗至通州曰有賢長吏治之矣賢聲出畿郡  
上尤加意學校表厲名教課諸生以業躬督勸之獎識  
髦俊後皆成大名如今少宗伯崔公桐大司徒馬公坤  
叅知錢公爍方伯陳公堯並所素課豫識士也將滿考  
奏績贈員外公訃至民會哭奔送殆空四境州有沙漲

地宜田宣家唐家二壩宜隄公墾田築隄則漲有新畬  
防有滌水是一役而興二利也募民佃漲地收其直充  
役費役且舉聞訃封題募金以遺後人其盡心於民推  
此可知也去職蹟譽益白銓司遲其至將顯用之服除  
赴銓公謁而已不私候貴人之門竟以常調授南京戶  
部員外郎積資遷郎中公靡事不周尤善財計司徒倚  
以為重賢聲又出留都郎曹上今上新政釐整弛敝  
會天下財賦獨以浙江江西蠹耗為多思得郎員才稱

任使者一人司徒以公名上授璽書以往公簡別屬吏分遣督逋自執要成以稽其惰敬晝夜蒐故牘得乾沒鉅贓株本則窮其節目枝尋條剝所得積逋溢於新賦謂藩臬諸司曰茲使也以督賦為功急則傷民緩則病國吾今所得財皆其已出於民而未入於國者賦集而民不擾庶於國有裨哉吾不敢以為功惟傷與病交免可以還報矣比反命入奏上嘉其功特賜褒美命吏部寵用之遂改授刑部郎中坐是取息年四十失官知者

慨恨之既廢事何太宜人承顏順志服勤左右每食躬  
視和飪嘗旨而後敬進之常自行厨區與竈養漿婦分  
役家人勞苦之公曰使堂上享之而甘吾獨惜此耶寒  
暑衣裳手振領循祛非潔新溫輒不使近體衾枕舒拂  
夕以為常侍疾省藥物尤謹或終夕不寐與弟孔煥居  
不忍相遠罄宦金買田宅歲羸月羨久益增廓折半均  
取不以尺寸自謀猶擇腴美以厚之愛弟之子廷均踰  
於愛陞也別置田七十石市屋五間資廷均為讀書費

何宜人安樂之曰汝撫弟姪如此吾復何憂孝友之實播在閭里誦傳相嗟嘆以為不可能也其餘恩足以及族人赴急持危情與力偕至孤弱不能立貧無告咸賴公以不失所邦國稱睦焉嗟乎公仕則勤於民廢亦施於有家出處皆有所立名位不亨而心跡可述矣其又何憾配陳氏贈宜人繼鄭氏知府鄭公良佐之妹前卒無子繼吳氏封宜人子陞娶南安黃氏故通政黃公河清之姪女女三長適黃衷故教諭黃公遠之孫次適黃

守吾知縣源之子三適黃思詔俱邑庠生孫男應錄邑  
庠生聘御史洪君庭桂女次應銘孫女長適鄉進士鄭  
一鳳子材立次許叅政黃公潤孫國俊以壬子十月卒  
距生丙午享年六十有七墓在西郊白塔山之原公所  
自卜也銘曰

雲者為雨可以徧下土既族而風之方施而處其在乎  
水為澤而洿不為川與河浸也不多以行于家終樂且  
嘉墳奏則筮和有母者皤髮白而顏醜其委其蛇門內

之實鄉人揚其華其又何嗟歸安斯原銘之使不磨

胡榕溪暨李孺人誌銘

友人胡子敬君禮為靖安教諭嘉靖壬子歲乞于江西督學使者曰禮之父老矣為一邑之子弟而遺吾老何以為心詞迫容感使者鄭公以子弟不可一日去賢師乞再三四不許踰年癸丑二月其父榕溪翁卒訃至子敬號呼欲絕不敢怨使者而自悼不釋是歲乙卯十二月十二日葬翁于晉江三十五都許內山之原以其婿



江貴溪君之狀來請銘安溪著姓胡氏在甲乙始自光州入閩不詳其世世以朴約相傳正統間最以仗義好俠有名曰欽者能以其貲為善事天順戊寅歲大饑出粟千石助賑上聞褒異賜以冠帶敕有司建亭旌之擇婿得蔡虛齋先生實識之於齠稚時而先生果以理學為一代名儒欽生英德教諭誼與虛齋以內兄弟相資於問學有聲庠序貢授遂安訓導積勞擢英德卒于官教諭公生翁名道字宗緒娶晉江南雄府經歷公英孫

女李氏英德公之歿翁千里扶櫬侍母陳太孺人能忍痛任勞役備極艱劇竟襄大事事母盡其力未嘗業儒以其質性應物少則順悌長老至壯無違行強艾敦交睦與無失意於倫輩耄期撫接卑幼尤巽抑不惰天資近於善祥厚閭閻不踐凶機非講擇可否而自合也居郡城之衢鄰叟里子日相過從舍中坐客無空日或一日不舍客則之他舍杯觴娛日不知日之邁也抱孫長息婚嫁有無茫若夢中事囊無贏財或一旦有以急告

倒囊與之比客至當具李孺人脫珥為具亦不問也孺人曲順其夫琴鼓瑟應好合雍如也翁喜謂所知曰使吾內有微忤亦安能樂如此耶子敬年十二三有美才試輒冠諸舊學老生屢失有司竟以貢起家翁終始不以喜愠闕意襟度夷曠曾靡疑吝無筐篋錙銖之殖而有本原方寸之積所以貽後者不嗇矣翁生成化癸巳行年八十一孺人生成化甲午卒於嘉靖辛丑未葬也至是與翁合焉三子長禮靖安君娶教諭莊海之女繼

白氏次麒娶知縣劉信之孫女次祐早卒女三人皆天  
孫男一山一潮一崑一山聘司訓王甫政公之孫女孫  
女長適晉江薛應會次適貴溪知縣江萬仞次許晉江  
庠生蔡雲嶽次許安溪庠生唐音之子道一餘三人皆  
幼翁淳心質行永年令終絕惡戮於家邦老而益為人  
所願居嘗履順無竒也翁嘗受安溪訓導周君某寓金  
一篋隣火翁適他出家人皇遽避火多所遺失寓篋獨  
無恙周訓導聞災拊心嘆曰亡吾金矣一日翁持故篋

界周曰金在此周驚喜如新獲以十金為謝翁艷然曰  
使吾為金獨不可利此一篋乎而受十金也周感服再  
拜斯亦竒矣銘曰

軼軼者擾乎囂囂者矯乎決道之藩而騷性之徼於天  
之人小者平復樸而去藻外黑而中皦謂翁之生也貌  
乎其原臚臚其坎窞窞歸斯藏者窅乎

黃濱溪處士墓誌銘

安溪參山黃生大本稚年而志學余嘉其志而許之游

其愿而篤可教也余又因生以知黃君善繼君之先世  
皆不仕其父添養蚤世君少孤不克就學而所居有山  
水之美田園之饒守其恬質以隱家近桐溪臨水垂釣  
或放舟獨往縱意所如不復知有世上之榮身外之物  
也故自號曰濱溪黃生從余遊時傳其說歸與族人言  
參山固朴處族人多不為詩書語舉以黃生為笑君獨  
好聽其說久之則幡然謂黃生曰吾等僻處窮山耳目  
無所聞見徒竊活耳何由得見此人以發吾蒙也黃生

以為言且期來見已而以母病未果來已而自以疾不  
果是歲二月七日則黃生以君之訃來矣予聞而悲之  
而黃生復以君之葬告曰乞一言以志其藏蓋君竟以  
無子死而其存則與嫡母林氏母方氏謀所以嗣其家  
者選於族屬之最親而擇其愛者大任以為嗣書以遺  
其妻莆氏曰我死則大任吾子也黃生慰之曰世父何  
遽謀至此姑自攝勿及此不祥語以自傷也今既卒而  
大任奉其治命以終三母之托故黃生為營其葬而圖

所以不沒其人者以屬予曰是其生悅聞先生之說願  
出門下而未得者先生尚哀而許之以幸吾父於地下也  
余既知君之意如前所述而為君之子者又吾徒之弟大  
任也其可得辭君字士孝生四十有四歲而歿歿之後一  
月而生女而以是年十二月十九日葬于其鄉員潭山  
之原嗚呼其可哀也夫然予觀世人老而無子者猶不  
知所以自決而卒制於他人之手繼嗣不定以敗其家  
而歿其祀者往往有之君獨能以盛年為遠計而其選



擇之慎付受之明使狡焉思啟者不得搖乎其間亦有  
可賢者與銘曰

禮之所出爰輔以律本人之情厥正而悉無嗣之凶有  
續其懿非無倫序曰愛之必生而宜之其死也謚爾克  
有子在計早乞我銘其幽有如皦日

處士順吾王公配龔孺人墓誌銘

順吾翁之卒在嘉靖癸卯十二月其嫡長子綿緩前卒  
庶子績約級續皆弱且幼丙午四月配龔孺人亦卒乙

卯正月二十五之吉四子與綿之遺孤孚中始克奉翁孺人祔于龍山考妣之兆四子已納室有子及綿緩之孤有孫十一人孚中亦有子一人葬雖緩而周事合禮庶其無悔翁名陞字德敷父瑟齋公瑞昌母蔡孺人大父義齋公永堅曾大父明軒公庭中皆以好義力善儀表一鄉世以為樂不慕榮進翁少而敏悟過人讀書不多誦數已熟久而不忘母患其弱以書為勞也讀輒禁之嘗潛投里中學舍從師授書母輒遣人譙讓其師是

欲殺吾兒耶里中師相戒莫受王生卒業故翁終不得  
以場屋之業干有司性固好書史傳雜記稗諧小說汎  
覽多識其言體事切物而貫以義理遇人輒言之為父  
兄言慈友為子弟言孝恭援證宿事昔說聽者莫不  
竦喜講禮修儀居常矜整動救約人以容節好入里中  
學舍問子弟所業而課之故里中後生遨手足褻衣冠  
學舍子弟業鈍惰艱於應課者往往走匿里中凶吉有  
資於文詞如聘昏勸學奠死銘葬之作多以翁為屬善

為七弦彈中年遊金陵以琴有聲士大夫交下之冀聞  
其音遇意無忤為鼓一再行而已秀目修髯資渾朴而  
有韻致解紛弭鬪不厭強聒說而罷者尤多郡縣知名  
常召見之言即為言孰利當興舉而不言其不善者前  
守四明屠東厓令山陰錢五齋兩公並優禮之屠公復  
加獎激畀以郡檄主一鄉之約翁納檄郡中為屠守言  
勸誘一鄉之長幼此未死老氓所宜盡心表率督勵則  
非所任守嘉歎之以為質而近厚也始蔡母禁翁讀書

誠患其弱亦其家有餘衣食無覲於外安於分域之內以自足也翁不巧謀生晚而多子不無以家迫為戚賴其疏綽不急之度有以自寬亦嘗追憾見禁其母不專於書而慨然有羨於榮貴之會也吁可念也龔孺人尤舒遲而無機祥懿之行周旋始終不憂不怒宜於一家與夫偕老而同德翁雖隱約不顯然無害於性以全其天永居世之齡而久其善鄉之蹟又何憾羨於彼此也翁四女皆嫁名家子而仲女之夫黃物備博學有文詞

以貢歷官為王府教授宜為銘翁之子孫謂某寔維持  
其家不負顧言之託必以見委是則何敢而銘其何可  
辭王氏有姓於安平所可知者元之將季自二十九郎  
三十一郎而至明軒公其遠不可詳也翁嘗命某以訪  
譜之責從宦中外始得莆田王譜而通之其為晉江派  
者二十九郎三十一郎之號灼然可據其他官行名號  
猶有不可質者故某與弟惟中與其族人叅政鳳靈知  
縣一貫序宗盟而未即合譜不及以講于翁斯責未塞

也王氏祠堂由翁倡為之制法有未備某方嗣為之墳  
兆之在東埔者某僭竭力其間以畢翁志是其銘翁之  
墳庶無愧於幽明銘曰

於邦國可以有為而不得為於族欲有以為而不及為  
非智不足有物司之惟其繩矩於家牖攜於鄉是亦謂  
為奚其為為而後謂之為

封戶部主事南圃張公墓誌銘

公名良寶初名文會字廷際泉州晉江人高祖自牧

公仲端由安溪徙郡城曾祖進修公宗應祖寬以鄉薦  
歷官終應天府學教授別號慎齋德學為鄉之先正  
父仗義公秉德嫡母何氏慎齋公為山東荏平教諭最  
善其邑人邵光祿公故為仗義公納其孫女是為公之  
生母慎齋於諸孫中尤器公授之帶一圍公裳一襲顯  
示屬意云此兒必興吾宗慎齋公久官而貧公以經教  
童子自給劬學不廢旦夜博涉他書業成矣而屢躋於  
有司因改業以謀祿仕居家躬行孝弟率屬同姓大書



忠孝勤儉于祠堂而梓慎齋公遺訓子姓人授一編子  
姓中少有過差輒舉祖訓以警勉之撫弟之子如己子  
誰父之居以居之追遠之敬嚴於祀事每厥明少長未  
集公已衣冠拱立祀先之所畢祭而享歷歷舉其祖平  
生曰吾張氏以孝弟立家慎齋公益篤友于仗義公不  
替家法兄弟終身無間言念德敦行吾與若等責也戒  
諭敦敦懇至羣從皆化之張氏一門尊卑殆百人雖折  
屋殊爨雍睦如一家泉人不知其孰為親疎也與鄉人

處一以忠信為主而綜練世故洞悉人情鄉有鬪訟或  
官府不能平質公一言而解其誠心足以感之而明達  
能中人曲直機要曲者自為公屈蓋未仕而率族睦里  
之行已施於有政矣年五十赴銓得吳江尉邑稱富劇  
公佐理有餘力邑長開州王公一以政委之王公受成  
而已邑以大治郡守天水胡可泉公英察難事倚公如  
左右手郡屬邑令皆甲第名流其所編徭冊民屢愬不  
能定胡公盡以託公比冊出無復愬者督賦不急不弛

常先他邑辦集有巨姓逋租萬斛重賂求緩公麾去之  
治之益急舟運稊載一朝而逋畢輸以敏慎仁恕屢受  
臺獎而已於卑位不能薦之也高御史世魁直諫忤旨  
就所部逮赴詔獄屬吏憚怯避去公獨周旋其間諸屬  
皆義而愧之在職滿考值仲子行吾君志選登己丑進  
士即棄官歸行吾尹諸暨及為戶部郎出知常州府政  
業卓異時論歸美之皆稟公之教也以行吾戶部主事  
之考得封嘗一視行吾君于常州道出吳江邑人老稚

迎觀追送皆謂自公去後無尉賢如公者在郡邸值蘇州海上三家寇作吳中皆警天子為置大將調數路之兵誅之督府檄常州君專謀其兵事公密授方略寇平督府論常州君之功獨多常州君以凱旋郡公亦還家矣舟次錢塘忽一人叩窻而入懷五百金為謝驚問為誰曰常州民某獄寃數年得太守辨釋以此為銜珠之報公峻卻之其隱行如此受封榮貴垂三十載欽欽謙抑不入公門未嘗以氣力加人微時所與處相好如初

一飯之惠必酬飲食而甘必推及所厚出不乘輿常徒  
行道中邂逅舊故立談款款移時賤者即之不知其為

貴貧者即之不知其為富少者即之不知其為老也置  
學田作書舍資子孫講肄開園鑿池作萃樂亭以娛族  
與鄉之高年為逸老會而故林沙溪陳葺菴鄭一齋公  
皆以勝流相聚游尤可尚也自卜壽域于棠陰山在清  
源山之麓諸子治別業以近其域各有結構風致公時  
往觀課學視耕之外留連佳景貴富壽康備人生之盛

然每值誕辰輒不許子孫作樂曰吾祖父生日不能為  
懽吾不忍也孝思之至老而不渝蓋天性云念慎齋公  
當為張氏功德之宗欲久其祀行吾君迎其意以所分  
父田充慎齋公蒸嘗公甚悅之於母家尤篤往返京師  
必由陸至荏平謁邵氏家廟厚遺其子孫邵母諱日  
必屏居自傷淚蘇蘇下終老猶然德履之邵重于鄉邦  
有司鄉飲酒禮延為大賓雖以貴壽蓋尊其德也平生  
無病忽遘疾家人請用禱禳公不許幼孫或誦論語禱

爾于上下神祇以為諷公曰汝未讀下文邪病中聞壻  
之訃憂其女甚及女扶夫櫬至家相慰苦而公亦逝矣  
卒之前夕訣諸子孫皆立身守家大要言畢從容委化  
可謂考終矣為丙辰十一月九日也距生壬辰享年八  
十有五配薛氏封安人與公偕老長子志魁庠生先公  
卒娶諸葛氏次常州君也娶黃氏繼娶侯氏皆以夫貴  
為安人志騰娶黃氏志顥娶史氏志尹庠生娶林氏女  
適博白知縣李士絢孫男八人守質守為守臣俱庠生

守介守孚守藩守教守嘉孫女十三人適許皆名家  
行吾君遵公之教友和諸弟誨誘子姓彬彬多成材將  
益昌其世而公積慶詒謀之善彌遠而光矣以十二月  
十七日奉公葬于所治之藏而乞銘於某曰公遺命也  
銘曰

崇陰之丘蟠紉其虬築之球球外曠而中幽生乎樂於  
斯死也藏於斯更千百世其勿休祥嘏是速

蔡母嘉柔孺人溫氏墓誌銘



王氏與蔡氏世姻子孫皆世以姑舅之講為兄弟兩家  
之好非一日矣吾先大夫與蔡密齋公管行輩兄弟也密  
齋之子明達發達復呼予為兄故其葬母溫孺人以銘  
墓之文為請而不當辭孺人歸密齋公而其父略齋公  
泗為邑庠生居家好禮母吳氏性嚴孺人事舅姑無不  
當意間居寡言若不甚慧臨事斬斬有條理臧獲經其  
指授則課計見效或不得命偶自為之輒缺敗妯娌有  
所營辦視其舉止赴之而已蔡氏族指繁諸婦多名閥

或以門第矜倨孺人及孺人為婦久之賢聲聞於宗諸  
矜者顧媿敬孺人悔其初倨也家方起而密齋公沒孺  
人年三十六耳三子皆幼當憂悲窘約之際撫孤持門  
戶如秋葉融風凜凜將墜能維護其長子自達治密齋  
之葬而乞銘於故給事史筍江公曰使賢人誌其藏吾  
夫子瞑目入土矣維是未亡人之責在三孤也未幾自  
達歿孺人哭之殆毀忍死自力雖衰而志不墮育二孤  
鞠瘁朝夕不以姑息妨督課拾掇細碎積羸致豐二子

行貨吳越中貲殖殷起孺人亦病矣方驚召二子曰富  
不忘貧則富不入於貧矣慎無忘玃玃危困時也又曰  
吾起貧家最知貧家之急汝則割田數十畝待族人之  
饑者則我可以死矣二子就床下書佃名歲得穀三十  
石曰義田孺人視書畢遂瞑實嘉靖甲辰歲九月七日  
年六十有三今其子逡巡在鄉黨間歛退悞縮無敢有  
敖言侈行猶思母之訓也墓在三都張林山之原與密  
齋異兆明達娶伍氏發達娶許氏皆未子明達女三人

長適王繒次適叅議伍公鎧之孫祖誨次許黃志淑發  
達女一人許黃士儼女三人適伍宗道柯理許釗墓坐  
卯向酉為七壙二子婦異日皆將祔焉葬之日為嘉靖  
丙辰年十二月二十一日銘曰

儉能起其家之屯惠能恤其族之貧匪直也婦其才實  
夫猗嗟乎令人

陳約齋處士暨鄭氏墓誌銘

陳約齋君以嘉靖丁酉四月二十日卒年四十遺孤長

者十歲次未能言也將卒謂其室鄭氏曰勿遽葬我室  
謂君慮貧不即舉也君搖首曰第待之鄭不得終請已  
瞑越六月十九日鄭亦卒至是嘉靖丁巳十二月二十  
六日子長者始以丙辰進士葬其父母于邑之湖頭山  
周事飾禮人始曉君所為待也晉江有陳氏著矣遠祖  
孚中公好學能詩遭元季喪亂仕不得志終同安惠安  
順昌三縣令入我明而章應公首膺進士科為郡衣冠  
之倡歷榆次繁峙安丘三縣丞以才廉召為禮部儀制

主事太祖閱功狀大異之。璽書褒美。下本郡榜之。里門以寵之。馬榜猶藏于家。永樂間。道曾公以進士選為翰林庶吉士。授雲南道御史。澹於榮利。乞為校官。以名節終。是為君之四世。六世祖高祖某。曾祖某。父某。皆不仕。母張氏早歿。二兄曰謙曰恭。相繼歿。君獨力貧以奉母。而撫幼弟。任方弱年。已勝壯子弟之責。家最窮。空自以門閥世舊。所為自力於窘急。以給朝夕。雖備嘗辛苦。而不夷於市井。溷鄙及涉事日。更識恢。知益人。往往以事

赴之不以昏夜風雨為辟忿戾方糾談啞渙折謬迷難  
諭指畫開暢門戶日尊忘其瘁替陳氏故里正所轄戶  
猥多强者難馭乏者難輯宗人屬君持役府縣每下追  
召徵率能使强者不叛乏者不逃賦集事辦縣官屢賞  
其能轄戶甚安之宗人咸喜舉酒屬之曰微吾子吾宗  
里正敗矣事有急時間出權數以濟或咎君以少欺君  
曰吾以濟事而不以舞人少欺何傷性侗儻善羣杯羹  
樽酒之聚譁洽洞款人人如得醉飽大會廣坐得君以

益懽每集君在後至者聞笑聲曰是約齋耶爭先趨入

少讀書不能多而札牘來往語言反復動有章采皆從

耳剽得之其聰聞警解有過人者陳氏指寂繁君年未

盛已翹然為一姓之特亦其所自致然也然心顧獨善

謹守禮法踐繩抱矩之行子幼已訓責有法進士君居

身莊畏粥粥如恐墮足失口人謂不類其父不知遺教

有存也每置子膝前語內曰此英物也踵諸父而起以

嗣二祖之芳烈必有屬矣時君之從兄西郭君蕙以御



史有名臺中所謂諸父也鄭氏婉孌而靜兩人氣度若不入而相友如賓終身無忤言違色絕不以貧故微對其夫其竭意承順若恐傷之宛曲內至有賢婦人所難者進士君悲不得事其父母雖以顯葬悼恨刺心如不能生故以墓中之石托予曰將藉此以寘死予方不知所以生而能為君圖乎君學於舅氏鄉進士鄭君良璧超詣卓出文為諸生冠四方之士將知之而謂予獨知其文君之所以托予者過矣約齋君名寬字存太長

子選進士君也次子會進士君娶李氏繼娶曾氏故嘉興府知府曾仲魁之季女會娶某氏君勇於為義故處約所勇者非不足著其最可著者嘉靖丙申丁酉連歲大飢民飢多餓死君誠縣發賑自實轄戶率之詣縣受粟概量平均餓者得粟皆活嗟乎君所以有待而葬非徒知其子固有以自知也哉銘曰

闕

贈刑部主事吳雙湖公配金安人墓碣銘

夫踵躅而貴人之所同欲也而降之于奪制乎命象賢

而肖人之所得為也而修之情勉視其志然世常急於  
欲而後乎其所以至乃越力分以與有制者角盡棄  
職性而茫不加修或幸而遂其所欲墮盛數美比比而  
是俗顧以為能似其先而世其家也其力為善而遇不  
顯者且歸以析薪弗荷之愧嗟乎成敗之論方眩而肖悖  
之實不明為子孫者忘所有事而自失者衆矣樂清吳  
雙湖公九仁字可為故尚書章恭毅公綸之孫而故方  
伯公玄應之子也恭毅公忠義風烈巍然一代名臣而

布政公廉直才敏為名宦後人肖之為尤難而雙湖以  
儒衣老死賤貧矣予獨以為肖子將以闢一時成敗之  
論之惑而使世之為子孫者知所職也公行篤言信不  
忍損直以徇物不憚矯俗以亢已以佞巧為穿窬之術  
以鄙吝為輿臺之行天資近厚主於易良遇事不可意  
人有不善輒面艷語怒若稜棘不可靡磊落濶視蕩無  
城府舉世何足屑而居起作止自為防檢一繩一矩逡  
巡不少爽絕不預人短長鄉隣有爭相率來質折其曲

直不為嫌避買交市名心所深恥人以乏且急為告竭  
其力所及副之其性嗜義而自以賢哲之後知有重職  
而不敢惰棄故也少讀父書發憤致精師悅其專同輩  
畏其苦刻也宿說舊訓彊記熟思能演暢其旨為邑才  
弟子負文必傳經不喜為附枝蔓葉後進浮靡者每躡  
之公亦倦場屋而謝去矣以其專苦用之於詩結社鴈  
宕山下搜奇抉勝琢雕倡和其句冰寒雪潔有騷人隱  
者之遺風稿至數百篇可傳也以公之好學使不自謝

去於世之所欲者未必終不得之誠知重其常職而不以予於命者易之也然公自謝時今僉事君朝鳳方為弟子負公慨然曰吾祖父詩書之業有屬矣僉事君果以甲辰進士起家贈公以所得官為刑部主事於人之所欲亦烏為不得哉僉事君為進士使江西竣事不受一帕束手歸覲拜公於堂喜曰筮仕宜若此庶幾不辱為賢哲後矣然有進於此者兒子勉之公妻贈太安人金氏處州太平府訓導公核之女媿德於公公教子嚴

安人能不以小慈敗其訓公踈於生事安人能不以欲  
富撓其高事方伯公與姑蔡孺人孝敬無違治門內之  
政賓祭中禮衣食有節旁施下馭條法斬如也公晚自  
休窮山水之美以昌其詩由安人為之內也公以嘉靖  
丙午七月二十日卒而以戊申十月與安人合葬于馬  
家前山從先人之兆蓋安人前公卒九年矣僉事君按  
閩使至清源山中以墓上之碣為請且敘其姓所由復  
曰吳氏台州仙居人也宋太師康肅公弗初為樂清尉

弟荆從焉娶於北閣潘氏因家樂清是為北閣吳氏荆  
生芳大芳大生世簡簡生德甫甫生日起起生開宗幼  
孤依母姨夫南閣章希恩以居長而從其姓仕元為德  
清縣典史開宗生性性生新民新民生文寶尚書恭毅  
公之父也然方伯公皆與北閣吳氏敘宗而姓仍章氏  
以先世之恩未遠而不忍也顧其志存焉故吾先君以  
先志責朝鳳且幸通藉於朝而得請也今之為吳氏吾  
祖之志而先君之教也嗟夫是亦公之知所職以肖其



先之事也銘曰

顯顯尚書朝之大忠奮義徇國不有其躬所徇伊何庭  
有壽誼英廟狩還南內部封檢夫觀釁危及儲宮集議  
闕下千官震恫顧軀戀孥草仆隨風背汗胸顫莫敢異  
同禁不出聲嗾咽有春尚書其時儀部郎中義形於色  
叱斥權克疏入極諍劇虎執龍敲榜鉗灼死靡悔痼三  
歲纏拳肌瘡出蟲且登于天釋幽躋融守道匡時大節  
始終書于史氏跡名駿鴻孰是孫子不念休美胡以念

之曰先是似胡以似之蹈仁服禮穹階峻秩有貽先恥  
公阨于遇而力為士我勗公行是為肖子詩于隧石其  
永不毀

附碑

撫寇碑

汀漳於閩為要郡上杭汀巖邑也邑溪南之鄉崇山造  
天牙錯距躍隴阪緣亘箐薄密綿其民狎為非義獍  
噬狙攫席衽戈甲禦寇無時風氣所限非性故然長

子育孫生蕃齒盛耳目熟習莫改厥德少視其壯壯視其老蹲危逗幽迺為盜藪厥有治者不揆其性不閔其習盜視彼民忿獷聖凶攻擊剗鋤如農疾莠惟懼不殘民不見德又弗做威既狃於習且偷其生鴟張螳怒攘奮踉跄吏既雙言民民亦毒吏雙言毒兩積交不得已於是溪南之民惡聲膠固歷彌年所湔滌無由豈不悲哉嘉靖癸卯之歲郡丞繆侯宗堯移攝事聞而嘆曰安有為吏而民寔雙言在邑所治處溪之南而視若異壤民

之不義惟為吏者之責吾將為溪南之民湔滌惡聲登  
濟維新偕之大道發教布令開以誠心民間不疑選日  
戒徒往涖其鄉而教諭梁君彥錦寔贊繆侯之計而決  
其行乃與訓導邾君夔率學官弟子丘道充道南李  
如珠賴榮先從焉戎器不除卒旅不具雍雍翼翼冠蓋  
斯戾魁首醜黨部勒有次稽首馬前爰崩厥角扶旄提  
倪觀于周道歡喜歌呼激越林莽昔為魁首今為長正  
昔為醜黨今為編氓刮癢洗疥復還骨肉撥霧掀瞠再

親白日民視繆侯如出子寄孥久離乳哺一旦還歸婉  
戀膝下始識慈母民視梁君如駢童驕孺未識衣冠驟  
謁師傅拱揖步趨盼顧驚喜吏既誠民民亦懷吏周行  
疆畝攷閱壁壘曰險爾平曰翳爾闢曰萊爾易迺犒牛  
酒迺給耒耜迺分麻縷迺置門塾男耘女織各得其業  
戶誦家吟知慕為士向之盜名棄去如脫溪南山川出  
垢遺濁光色發揚蒼蒼濯濯嗚呼是溪南也在昔若彼  
在今如此烏覩所謂習哉吏不能以誠撫民而惟頑之

疾民之不得其性者可勝道耶梁君今為泉州南安令以繆侯撫寇之蹟告予曰願有記予不識繆侯而知梁君之言可信故特書之貽上杭之民使勒之石以昭不忘

膚功遺愛碑

蔣維業劉伯需踵門見予衣屨菲陋貌俚而視野予不知其何為來卒然言曰將有請予怪問之曰吾漳州龍溪大地里人也巖棲而隴耨作息在溪壑之間以其幽

昧荒阻居之西園常患盜焉苦之而不能禦是歲八月  
汀漳守備俞公以督府之檄來徼盜盡得之吾等不忘  
其功將勒之石予曰守備逐盜而得盜職也若何石焉  
曰吾等深有不可忘者不獨以得盜也凡盜之攻奪吾  
聚落避之猶有可免哀之猶有可丐而吏士之逐盜至  
者進無可丐之門退無可避之路甚哉其莫之哀而不  
得也故未嘗有得盜之功而重以播民之虐今俞守備  
之至吾地禁戒肅而約束明卒無敢喧于閭吾安吾栖

而治吾耨作息循旦暮之候而不知兵之在吾境老稚  
嬉遊以閱俘馘之過而無變容驚已之虞畜之字於埭  
者可數而收葵之在園者莖葉無所損老詔其少尊語  
其卑不圖生身以來獲蒙此幸壺飡斗酒之饋却而不  
嘗山織野繭之所治又不敢以獻相與爵而不鬯謀所  
以報之其術無絲是以敢冒然而來請也二人者田野  
之人也其言質而慤予恠其知不忘俞公之德而又知  
來請予之文孰謂野人而不知禮哉孰謂野人而不知



好義哉吾何說以辭之哉遂次其語以畀之因名其石  
曰膚功遺愛使歸鑄之以旌俞君之伐以不孤二人之  
勤而慰大地里人之意俞君名大猷字志輔以泉州衛  
百戶由武舉歷陞為汀漳守備署都指揮僉事

龜湖水利頌德碑

邑東南鄉之田皆仰水於湖其浸鉅而灌博者龜湖為  
最環湖而廬且萬家支村析聚櫛比衽聯總其鄉之名  
曰龜湖蓋以湖名其鄉也寶蓋金鞍玉屏諸山之水醜

為四溪流入於湖瀕湖仰水之田度萬餘畝民蒙其利而不能知其始所由作惟畜泄之節淤決之禁昉列科條謂之塘規者知其始於宋蔡忠惠公襄守泉時所留也號湖以塘蓋邑俗方言云湖水之利於田若是博故有隄以捍海堰以陘潦坊以瀦止庸以宣流而嚙淫潰洑之害必有資於人力歲治月修然後無害水庸之啟閉有情以妨時有奸以病衆而豪右之侵爭狂狡之盜詭皆所以為湖之患其具不得不出於政刑所謂規者

實於是取之由宋至今殆五百年守陂之夫雖具而官  
弗予直故守者常怠而廢事民以請於前守方公克視  
篆節推袁公世榮議協于民為請於部使者既許而二  
公去莫之行也屬南衡童公來守郡以事行治屬問民  
利病而龜湖首及焉民方欲言公顧就而問之於是有  
以前議得請為言者公即符下晉江無留牘又盡民之  
所言繙牘得為所增議塘規二十九條行之其鄉公善  
以寬碩接其民使樂於有為不待撻罰而相誠以率禁

其勤也無斗酒尺帛之勞而自勸湖以無患比歲荐登  
田入羨倍粟溢他鄉人皆以侯之福我也相與伐石勒  
公之德且期以申教是規之詳於不廢也觀古治民之  
吏以循良見稱其善非一而水利之興修為最艱之白  
渠蜀之離堆楚之芍陂越之鑑湖尤其著者也作者非  
不欲為無窮之利而脩復之功每有待於後人蓋民庶  
乖分世祀遷易則弊萌蠹穴伏於其間如芍陂作於  
孫叔敖至何武鄧艾劉頌魏欣趙軌歷數世皆以有功

於陂為民所記而馬臻孟顛尤有記於越以鑑湖之功也觀其所為如伐木通榛以納衆流增闢水門益廣灌溉計功受分使大小戮力與夫禁民壅湖為田立水約以裁貪爭皆於續規脗合蓋古今異便而水利興脩之宜不越此也斯規之有裨於湖而不足恃以不廢法固有待乎人者故予特為記之非徒副民之請以述童侯之德將以遺後之為政者於無窮云

刻招魂章碑石

泉之為郡東南履海延袤迤邐畫岸為疆如循衣裾緣  
岸曲折蟠屈人營其間以居對視列島隱見出沒烟濤  
雲浪間錯落若置碁聚塊皆蠻人邑國也無重關穹壁  
斷蹊絕坂之限舟浮水面負巨颿而行日可踔數百里  
島外諸國皆有奇產異物珍瓌恠詭邀利忘生之夫枕  
席大險以牟鉅贏故泉之盜患莫劇於海嘉靖二十二  
年夏五月盜犯深滬鎮深滬於緣岸之居聚人為衆而  
據地為固民相率糾義以禦之吾郡別駕陳侯少華方


司郡徼督捕至海上聞深滬之民將率義禦賊檄而許之民既奮於義以相保聚比得侯命益堅且奮盜鬪不能勝獲其魁首殲其黨奪其舟兵盡島外諸蠻也吾民鬪而死者二人傷者亦若干人侯親為撫循勞定振護賙給民皆洗瘢刮疥迅踊而起忘其為創也又哀死者之不幸為賦招魂二章以祭之民之鬪而不死與不在鬪而存者雖有智有愚於所賦之義或解或不解莫不感誦嗟歎激於脾肺播於齒頰謂侯之能用我也自農

不為兵而攻刺擊殺之事不任於民而死者又人之所甚愛難者其所難犯世之患盜者固以為無可用之民視盜之猖披潰決莫能措一籌其間其亦未覩今之事乎庠生陳邦竒深滬人也所謂智而能解其義者也將摹侯之賦刻諸堅石以繫其民不忘之思而乞記於予侯詩詞閎富妙麗絕出一時所為招魂之章酷似楚人當別行於風騷之場予故不論而獨著其能用民以備禦者以授陳生使歸刻焉





遵巖集卷十五



總校官進士臣胡榮

校對官中書臣李斯咏

謄錄監生臣陳覲龍